

SAN PABLO KARTA E'SU FXI'JNI KORINTO ÇXHABTEWE'SX JÏI

Dxus yakh fxi'zesatx Pablo fxi'jni

¹ Jesukristo jxkaahnisa Pablo yaaseth, txã'wê yûuwa'ja's Dxusku jxthâas txâa pa'ga. Naa karta's yakthê'j Timoteo yakh fxi'jçxa ka-jaçthu Dxus luuçx Korinto çxhabte pkhaakhena ùssawe'sxtxi. Sa' txâawe'sxtxiçxâa mée, Akaya kiwesuwe'sx Dxus luuçx jxukaysawe'sx jïi yã'jçxa fxi'jaçthu weçxana. ² I'kwe'sxtxi' Dxus kwe'sx tata' pu'çxhina vxite' kwe'sxtxi jxpe'jsa Jesukristowa, txâa pa'ga Dxus yakhçxâa mfxi'zewe.

Pablo pxthaa nxuste fxi'zeni

³ Açxha' Dxusa's wala weçxawa'j ji'ptha'w, txã' kwe'sxtxi jxpe'jsa Jesukristo Tata', txâasak kwe'sxtxi's peeygãhçxa bagaçxtewa kvxiisxa'jna nes yu'. ⁴ Kwe'sxtxi' kïjkïh nxuswa'j en pa'thewa, kvxiisxa'ja'k Dxusa', aç'a' txâa ma'wêga kwe'sxtxi's kvxiisxa'j, txã'wêy kwe'sxwa vxitesa nxusna fxi'zesatx kvxiisxa'khanku txã'wê yû'. ⁵ Kristo's nwêese'pha'ga ma'wêga seena' nxuswa'j en pa'ja', nawa Kristo pu'çxte', txã'wêyçxâatha'w kvxiisxa'jnisa'swa jxpa'ga'. ⁶ Txã'wê i'kwe'sx ewte neeyûuwa'ja's jxpa'gaçxa kvxiisxa'jni yuukahnthaw kwe'sxa' nxuste fxi'ze'. Dxusa' kwe'sxtxi kvxiisxa'jçxa', i'kwe'sxtxiwa txã'wêy

kvxiisxa'jçxa ewte nvxiituna, kxah i'kwe'sxa' wantäyya' äjane'kwe kwe'sxtxi nxuswa'j en pa'ja'k txã'wëysa i'kwe'sxtxiwa pa'thewa. ⁷ I'kwe'sxa' nxuswa'j ena'sa' jxpa'gaçxa', Dxus kvxiisxa'jni'swa txã'wëyçxáa jxpa'gawa'jsa i'kwe txã'wë yũuwa'ja's ew jiitha'w.

⁸ Asia kiwete ma'wëtká seena' nxussa's ji'phu txã'sna miijajkxwe, yakthë'jwe'sx. Kxteea' iimejk seena' wala nxuswa'j en pa'j, açá' peena yu' ìtxĩ fxi'zewa'j ji'phmeene'tka sũju'th wantäyya' çxhãçxhameeçxa. ⁹ Äçxha' uu en yuhna sũju'çxáath. Nawa naa kiwete ìtxĩ fxi'zeni's yajkxmée Dxus ìtxĩ vxit-sana yaakxkahnçxáak txã'wë yuu. ¹⁰ Txakwe seena' uuwa'theçxáa yã'j fxi'zeçtewa, Dxusa' adxa's nwe'wek, sa' äçxwa nwe'wena nes txã'wë'. ¹¹ Kwe'sx pa'gate i'kwe'sxa' Dxus yakh puutx we'wepa'ga txã'wë nwe'wena nes yuuna sũhna Dxusçxáanath yaaki'. Sa' nasa maazkuëesawa kwe'sx pa'gate Dxus yakh puutx we'wete', Dxusa' kwe'sxtxi nwe'wena açá' txãawe'sxa' Dxusa's weçxaatxna.

Pablo' kñh yuuçxaga Korinton u'jmée

¹² Isath we'we', Dxusa's açesawe'sx yakhwa ew yuuçxáath yũuna fxi'ze, sa' i'kwe'sx yakh yu' wejxthu txã'wë ewçxáa fxi'ze sũhna yuuçxáak üusuthe', txãa pa'gath weçxá'. Txa'wë ew yũuna fxi'zewa'ja's Dxusku pu'çx, açá' peekx üusuhçxáa çxhãçxha yajkçxçxa txã'wë ew fxi'zemeeth. ¹³ Adxa' i'kwe'sxtxi karta fxi'jçxa', ìsxiiya' sũhçxa fxiy yajkxna fxi'jmeeth, açá' i'kwe'sxa' kuh jwed yaakxnuwe. ¹⁴ I'kwe'sx

maafi yu' adx kaapiya'jni' isasatewa jiyui'kwe na' ew jiyuna mjxã'jwe. Txã'wẽ ew jiyuçxa', kwe'sxtxi jxpe'jsa Jesus kĩhte', i'kwe'sxa' wẽtwẽt yaakine'kwe adx i'kwe'sxtxi ew yũupa'ga, aça' adxwa wẽtwẽt yaaki'nja i'kwe'sx ew fxi'zepa'ga.

¹⁵ Txã'wẽ adx kaapiya'jni's ew jiaisai'kwe txãa pa'ga adxa' e'z us pa'jya' yuwe'nja sũhna yaakxnith ji'phu' i'kwe'sx yakh weçxana puutx uyya'. ¹⁶ Nyafxte' Macedonia kiwen u'jweççxa iipa'j u'jwe'nja. Sa' Macedoniajũ ki' sxawedna yuhçxa ki' pa'ja'nja sũju'th. Aça' kxtee ũsçxa Judea kiwen u'jweçte', i'kwe'sxa' adxa's pu'çxhine'kwe sũhna yaakxnith ji'phu'. ¹⁷ Ew ũus yajkxmey fxi'ja'ne' kxtey yu'nja jĩçxawa kxtey yu'çme', Dxusa's jiimeesa na'wẽ, sũjuwá'kwe. ¹⁸ Nawa Dxusa' jiaa' adxa' e'z jwed we'we'çmeeth i'kwe'sxtxi's. ¹⁹ Txã'wẽ yũukahmení Dxus Nçxi'k Jesukristo' bagaçxte yuhwa e'z jwed we'wemée isasaçxá'sku we'we', aça' kwe'sxa' txajx we'weni'stha'w pta'sxi' i'kwe'sx ksxavxyte Silwano, Timoteo vxite' adx yã'jçxa. ²⁰ Na'wẽ Dxusa' kĩh yũuwa'ja'swa puutx we'wek txã'sa' Kristo yuuçxáak jxuka kxtey yuu, Dxus puutx we'weni's kaavxya'ja'jna. Txãa pa'gatha'w Dxusa' bagaçxtewa kxtey yuusa' jĩna tuuthe'je'. ²¹ Txãasak Dxusa' adxna vxite' i'kwe'sxtxiwa pu'çx isasaçxá's kxtey yuuna fxi'zekahn, Kristo yuuçxá's selpiina fxi'zepa'ga. ²² Sa' Dxusa' kwe'sxtxi txhitxhçxa txajx Espiritu's peesku, Dxus jĩi yu'sa' kĩhnawa jxuka txã'wẽçxaçxáa jxpa'gawa'jsa i'kwe jĩna kaajiyu'jna.

23 Na'wē Korinton u'jwe'nja sūhçxawa, kxtey yuunimeeth. Nawa txãa yu' wejxwa i'kwe'sxtxi juuna' we'wena ũsya'meeth txã'wē yūu. Adx ũuste ĩsxiiçxa txã'jĩ'çmeeth txã'sa' Dxusa' jiia'. 24 I'kwe'sxtxi ũusaçxaçxa txã'wē yuhmée yuumeeth, wejxwa kimwa juuna' we'wemeete i'kwe'sx pwe'sxçxáa ewkuēeçxah yuwe's pheu'khanthu ũythasna txã'wē yūu. Adx txã'wē juuna' yūukahmenii i'kwe'sxa' Dxus yakh yu' çxhãçxha yã'j ũsi'kwe.

2

1 Aça' txã'wē juuna' we'weya'çxáa yu' u'jmeete ewna sūhnath yajkx. 2 Adxa's i'kwe'sx yuuçxáa wēt'wēt kaayaki'jwa'jsa i'kwe naapkaçx txã'wē adxa' i'kwe'sxtxi juuna' we'weçxa kxūusu'the', adxa's çkim wēt'wēt kaayaki'jikx? sūhnath yajkx. 3 Txãasath i'kwe'sxtxi kxūusu'jna pa'jya'mée kartaçxáa fxi'jçxa kaah, i'kwe'sx txã'wē ähmée yūuna ũspa'ga adxa' weçxana pa'japkaçxte, nxuswa'jçxáa ji'phu'nja sūhnath yajkx. Naasáa adx weçxana pa'the yuuçxáa i'kwe'sxwa txã'wēy weçxana ũswa'ja's ji'phune'kwe sūju'th. 4 Iiméh wala kuh yajkxna nxusçxa ũ'nenath karta's fxi'j, nawa i'kwe'sxtxi juuna' yuuçxa kxūusu'jya' sūhna ũusaçxaçxa txã'wē yūumeeth. Adxa' i'kwe'sx txã'wē ähmée yūupa'ga iiméh wala peeygãhçxaçxáath txã'wē ũ'nena fxi'j.

Kazx pkal yūusa's peltunãyçxa kvxiisxa'khan yu'kxpehni

5 Nawa txã'wē ähmée yūusa' adxçxáana txã'wē kxūusu'jme', i'kwe'sxtxiwa jxukaysatxku

txã'wẽ kxũusu'j, txã'wẽ kazx yũuçxa. (Txã'wẽ kazxku yũu jĩnaçxáath we'we' jxuka yu' pta'sxya'mée.) ⁶ I'kwe'sx puutx we'weçxa kastigãywa'ja's vxiti'kwe txã' kxtee pa'jçxáa ewna, jwee yu' thaakwe yuumée. ⁷ Wejxwa ãçxha' peltunãyçxa mekvxiisxa'jwe, txã'wẽme' wejx thaakwe wala nxusçxa isa jxukate vxituwe'sxte. ⁸ Txãa pa'gath i'kwe'sxtxi neewe'we' peeygãawa'ja's ki' ji'phukahñ txã'wẽ ãhmée yũusa's. ⁹ Juuna' yuukahñ i'kwe'sxtxi fxi'th, nawa adx jxkaahni's aan kxtey nwẽese'jetxna sũhçxaçxáath jiyuya' txã'wẽ yũu. ¹⁰ Æçxha' i'kwe'sxa' txã'wẽ ãhmée yũusa's kĩh yũuni'swa mpeltunaĩwe, adxwa peltunãythu peltunãywa'j ũsu'k txã'sa' Kristo dxi'pte, i'kwe'sx pwe'sx puiimée ew fxi'zekahñ. ¹¹ Txã'wẽme', eçxthẽ'ja' wala yuh jiia' kwe'sxtxi kaypuba'jçxa knaywa'ja's txã'sa' jiitha'w.

Troaste Tito's uymeeçxa, Pablo wala nxus yaakxni

¹² Kristo nwe'weni's pta'sxya' Troas çxhabte pa'the', Kristo's selpiina ũswa'j en wala yuh ewsa vxyaak. ¹³ Nawa kwe'sx yakthẽ'j Tito's uymeeçxa wala kuh yajkxthu, txãasath txajũ kasehçxa Macedonian u'j.

Kristo yakha' kĩhtewa jxukak ewçxáa ya'fxi'ze'

¹⁴ Nawa Dxusa' pu'çxhi'k Kristo Jesus yakh fxi'zete', kĩhtewa ewçxáa kaafxi'ze'jna, aç'a' txajx yuwe's mteewa kaajiyu'jwa'jsatha'w, maa maawa jiyuna jxã'khan. ¹⁵ Txãa pa'gatey kwe'sxa' Dxusa's jiiyã'jsa' vxite ewte

neeyũuwa'jsa ma'tx yuu meeçxa' vxituwa'jsa ma'tx yuu nawa kaajiyu'jwa'jsatha'w Dxus yakh fxi'zeni's. ¹⁶ Txã'wẽ yã'the', ¿kim txã'wẽ Dxus yuwe's kaajiyu'jya' u'jwa'jsa ũstxki? Vxituwa'jsa yakh yu', Dxus yakh fxi'zeni' wala yuh ewmée theguna, naapkaçxha' ewte neeyũuwa'jsa yakha' iiméh seena' zhiçxkwesa yuuna. ¹⁷ Maaíia' Dxus yuwe's yu'pthehçxa fxiytxi pta'sxna pekũju'. Nawa kwe'sxa' txã'wẽ yũ'çmeetha'w, sa' Dxus yuwe's vxyuu pa'gawa pta'sxna ũsmeetha'w. Txã'wẽ yũuya'méeii, kwe'sxa' Dxus kaahnisatha'w, Kristo's selpisáa. Txãasatha'w ĩsxiiimée ũusuh jxuka isasaçxá's we'we' Dxus dxi'pte.

3

Nwe'wewa'jsa u'se pheu'jçxa Dxus nvxiitnisa

¹ Txã'wẽ we'wena fxi'jçxa', peekiçxáa ewsath jĩnak we'we' ¿sũjuwá'kwe? Meeçxa' vxitewa na'wẽtx neewe'wenisa karta jxũçxa pa'ja' aça' txãawa txã'wẽy jxũçxa pa'jwa'j ji'pha' ¿sũjuwá'kwe? Meeçxawa i'kwe'sx neewe'wenisa karta kutxi'jwa'j ji'pha' ¿sũjuwá'kwe? ² Adxa' txã'wẽ vxitesa neewe'wenisa karta jxũçxa pa'jwa'j ji'phmeeth, txãa pa'gatey adxna neewe'wewa'jsa' i'kwe'sxiçxáa i'kwe. Txãasa adx mjĩini's maatxwa kaajiyu'jwa'jsa' i'kwe'sxi'kwe, karta na'wẽsa. ³ Kwe'sxtxi neewe'wesa' Kristo', txãasak txajx kuseju yuu fxi'jçxa karta ũs, aça' txãa karta' i'kwe'sxi'kwe. Nawa txãa karta' tintaju fxi'jni yuume'. Dxus Espiritujuk fxi'jni

yuu, sa' kwet taplatewa fxi'jni yuumée, nasaa ũustek fxi'jni neeyũu.

⁴ Kristo pu'çxpa'ga, Dxusa's selpiiya' ãjãth, txãasath ĩsxiimée isa we'we'. ⁵ Dxusa's selpiiya' ãjãnisa' peekxçxáa txã'wě ya'ãjã'çme'. Txã'sa' Dxus pu'çxtek txã'wě ya'ãjã'. ⁶ Dxusa' naa ensu nasatx nwe'weya' ãjãwa'ja's pheu'jçxa nvx-ihtku txã' leya's nwěese'jwa'j yu'çme', naasáa Dxus Espiritu's yuuçxáa ũuste jxpa'gawa'kh yu', aç'a' txã'sna pta'sxya' ãjãwa'ja'sku Dxusa' adxa's pu'çx. Ley fxi'jçxa nvxiitnisa' uuwa'theçxáak vxit, naapkaçxha' Dxus Espiritu' Dxus yakh fxi'zewa'ja'sku vxit.

⁷⁻⁸ Moises ley kwet taplate fxi'jnisa's jxpa'ga enteçxáa yuhwa seena' yuh zhiçxkwe eena' kweethku. Txãa pa'ga Moises dxi'pwa txã'wěyku eena' kweethna neeyũu. Aç'a' Israelwe'sxa' Moises dxi'pte thegya' ãjãmeeta', Moises dxi'pa' seena' eena' kweethpa'ga. Nawa tuhdtuhdçxah ũçxhana u'kh. Txã'wě uuwa'theçxáa vxit-sa leya's jxpa'ga enteçxáa yuhwa txã'wě seena' zhiçxkwe eena' kweethçxa', Dxus Espiritu kaapiya'jni en yu' wejx thaakwe zhiçxkwesa'. ⁹ Txã'wě yuuwesa i'kwe jina pta'sxsa leya's jxpa'ga enteçxáa yuhwa seena' zhiçxkwe yuuk aç'a' kwe'stxi yuuwemée ewte nvxiitwa'jsa's pta'sxni en yu' wejxku thaakwe zhiçxkwesa yu'. ¹⁰ Ley jxpa'ga ente' txã'wě yuh seena' zhiçxkwesa yuuk. Nawa açxh naa ensu thaakwe zhiçxkwesa vxyaak txãa yakh kaaja'da'the yu', nyafxiiwe'sxa' seelpimeesak yuu. ¹¹ Txaçxmeeçxáa selpiwa'jsa pa'j enteçxáa

yuhwa zhiçxkwe yuuçxa', bagaçxte yuhwa pçumée selpiwa'j en yu' wejx thaakwe zhiçxkwesa'.

¹² Txã'wē bagaçxte yuhwa pçumée selpiwa'ja's jiiçxath āate pta'sxna we'we'. ¹³ Adxa' Moises na'wē yūuçmeeth. Moisesa' txaçxmeeçxáa eena' kweethnisa ũçxhaçte Israelwe'sx uywe'sxte dxi'pa's yaaphku. ¹⁴ Sa' Moisesa' kīh yuukahn txã'wē yaaphtewa Israelwe'sxa' jiyumeeta'. Sa' āçxh pa'jwa aphni ũsna jiyukahmen, txāa pa'gatx txāa leya's lēeyçxawa jiyu'çmée. Aça' txāa aphnisa's Kristo's pi'kxçxa yuuçxáa phaadeya' ya'ājana. ¹⁵ Āçxpkaçx aphni ũsna, Moises fxi'jnitx lēeyçxawa jiyukahmen. ¹⁶ Aça' maawa Jesukristo tasxte utxaate yuuçxáak txāa aphnisa' phaadeni yu' jiyukahen. ¹⁷ Kwe'sxtxi jxpe'jsa' Dxus Espiritu', aça' txāa yakh ũste yu', jiyuwa'ja's weh yuhwa ya'jypubameena. ¹⁸ Txāa pa'gatey kwe'sxa' dxi'pa's yaaphni ji'phmeetha'w, txāa pa'gak Dxus kweethni' kwe'sx dxi'pte speeju na'wē eena' kweethya' ājã'. Aça' Dxus Espiritu pu'çxte', jxukaysa jwee íçxáatha'w Kristo ma'wēsate', txāa na'wēy fxi'zena u'jya' āja', kwe'sxtxi jxpe'jsa' Dxus Espiritu' txã'wē yūuwa'ja'sku pu'çxhi' naa pa'ga.

4

¹ Āhmeekwetewa Dxusku neewe'weçxa nvxiht txajx tasxte selpiwa'ja's, kxahtha'w çxhāçxha yajkxna fxi'ze'. ² Kwe'sxa' jxuka nvxihttha'w paaçte ewmée yūuna ĩsxiina fxi'zeni's. Txāasa ewmée yajkxçxa Dxus yuwe's yu'pthehna ũsmeetha'w. Isasaçxáanatha'w

we'we', aça' Dxus dxi'pte ãsxiija'çmeene' sũhnaçxáa miijajkxwe jxukaysa. ³ Nawa ewte nvxiitwa'jsa Dxus yuwe's pta'sxi'tha'w txã'sa' maai' yu' açxamée wáa ew jiyutxna, nawa txãa yu' vxituwa'jsa yakhçxáa txã'wẽ yũuna. ⁴ Txã'wẽ yũukahnii naa kiwete jxkaahna ũssa eçxthẽ'ja' txãawe'sx ũus yaakxni's jxuka aphku, Jesukristo Dxus na'wẽysa kaapiya'jni zhiçxkwesa's jiyukahmen. ⁵ Sa' kwe'sxtxi nwẽese'j jxthãasçxa pta'sxi'çmeetha'w, wejxwa kwe'sxtxi nwe'wesa Jesukristo yuuçxá's nwẽese'jwa'ja' jĩnaçxáatha'w pta'sxi', kwe'sxa' naasáa i'kwe'sxtxi selpiisaçxáatha'w, Jesusa's nwẽese'jsa. ⁶ Dxusa' nyafxiitey kĩh yuhwa meetey çxhi'dx walate eena'sa's kaakh kweethkahn txãa Dxusiçxáak kwe'sx ũustewa eena' kaakweethe'j, Jesukristo' Dxusiçxáatewa jiyukahn.

Dxusa' pu'çxhina sũhnaçxáa fxi'zeni

⁷ Dxusa' kwe'sxtxi's neewe'wek Kristo kaapiya'jni txakwe seena' zhiçxkwesa's. Nawa kwe'sxa' txã'wẽ seena' zhiçxkwesa's we'weya' yu' ajawa'jmeesatha'w, aça' txã'wẽ kwe'sx yu' ajameete i'çxáak Dxusçxaçxáa pu'çxhi'. ⁸ Txãasa'fiçxáak thẽyte fxi'zewa'j iiméh wala pa'thewa, txajũwa kasejxa' ajawa'ja's pu'çxhi'. Aça' nxuswa'j en pa'thewa, Dxusa' pu'çxhina sũhwa'j yuuçxá'stha'w ji'phu'. ⁹ Naa kiwetewe'sx yu' ahçetewa, Dxus yu' açeni fxi'ze'çmeetha'w. Pkxuuni fxi'zeçxawa, jxukate yu' vxituni yu'çmeetha'w. ¹⁰ Jesuswa ma'wẽga uu txãa na'wẽy uusáa na'wẽ yuuwa'j ji'ptha'w,

ĩtxĩ yuusáa Kristo pu'çxni's jxpa'gaçxa txãa na'wẽ yuuçxáa fxi'zeya'. ¹¹ Nawa kwe'sxa' naa kiwete nee fxi'ze'ççxa', bagaçxtewa ikh wëeniçxáatha'w fxi'ze', Jesus kaapiya'jni's pta'sxpa'ga. Txãa pa'gak ĩtxĩ yuusáa Kristo pu'çxni' vxyaana nes yu'. ¹² Txãasatha'w kwe'sxa' ikh wëeniçxá's jxpa'gana fxi'ze', naapkaçxha' i'kwe'sxa' Dxus yakh fxi'zewa'ja's i'kwe jxpa'gana fxi'ze'.

¹³ Dxus librute' na'jĩnak we'we': Dxus pu'çxwa'ja's jiith yu', txãasath txã'wẽ we'we' jĩ'k. Aça' kwe'sxwa txã'wẽy Dxus pu'çxwa'ja's ew jiitha'w, txãasatha'w pta'sxi'. ¹⁴ Sa' Dxusa' kwe'sxtxi na'wẽ yũuwa'ja'swa jiitha'w: Jesus uutewa ki' ĩtxĩ vxitku, sa' kwe'sxtxiwa txã'wẽy ki' ĩtxĩ vxituna. Txã'wẽ yũuçxa txajx ũsnite pe'jna u'jwena petx i'kwe'sx yã'jçxa Jesus yakh fxi'zepa'ga. ¹⁵ Kwe'sxa' pkxuuni nxustetha'w fxi'ze', nawa i'kwe'sx ewte fxi'zewa'ja's uykahntha'w txã'wẽ yu', kxah maazkuëesawa Dxus peeygãani's jxpa'gaçxa', kxaazkuëesay Dxusa's weçxana tuuthe'jetxna.

¹⁶ Txãasatha'w kwe'sxa' bagaçxtewa ũukhmée Dxusçxá's çxhãçxha yaaki'. Makwe kwe'sx kakwete çxhãçxhasa yu' pçuuna u'jweçtewa, Dxus yakh weçxana fxi'zewa'j yu' jweeĩçxáak een isa çxhãçxha ya'fxi'ze'. ¹⁷ Txãa pa'gatey naa kiwete nxuste fxi'zenisa' dudtewe'sxçxáa, txaçxmey skhẽwwa'jsa'. Aça' txãa skhẽwniijũ' bagaçxte yuhwa skhẽwwa'jsamée iiméh ewsa'sku cielute ya'ji'phu'. ¹⁸ Naa kiwetewe'sxa's yaakxwa'j ji'phmeetha'w, cielutewe'sxçxá's

yaakxwa'j ji'ptha'w. Txãa pa'gatey naa kiwetewe'sxa' txaçxmey skhêwwa'jsata', nawa cielutewe'sxa' багаçxte yuhwa skhêwwa'jsa meeta'.

5

¹ Txajjiçxáa kwe'sxa' ew jiitha'w naa kiwete ãtxĩ fxi'zenisa kakwe pçuutewa, vxite kakwe багаçxte yuhwa pçuwa'jsamée thaakwe ewsa kwe'sx jii pheu'jni ji'pha' Dxusa' cielute. Txã' pçuwa'jsa naa kiwetewe'sx na'wêsame'.

² Txahtha'w naa kakwete nxusna nee ãtxĩ fxi'zeççxa', dud cielute ũswa'j kakwe's jxpa'gawaça' sũhna yaaki'. ³ Txãjũ yuuçxa', kakwe ji'phmée yu' ũsmée, kakwe ji'ph neeyũ'nja'w. ⁴ Naa kakwete nee ãtxĩ fxi'zeççxa', nxus yajkxnatha'w fxi'ze'. Nawa naa kakwe ãisxsa's ahççxa dud uuwaça' sũhçxa txã'wê nxus yaaki'çmeetha'w, naasáa naa kakwe's dud phu'se'jni yuute', kwe'sx kakwe pçuwa'jsaçxawa kxtee u'se yuuna pa'jana sũhçxatha'w txã'wê yũuwa'ja's dud jxthãasu'. ⁵ Txã'wê yũuwa'ja's Dxusku pheu'j, txãasak txã'wê yũuwa'ja's jxpa'gawa'jsa yuji'kwe jĩçxa nyafxte txajx Espiritu's khuẽ'y ũs.

⁶ Pejka txã'wê yũuwa'jsa yuhtha'w, nawa naa kakwe yakh nee ãtxĩ ũsĩ yu', cielute kwe'sxtxi jxpe'jsa Jesukristo ũsna kxtee açxhĩ yu' ũsya' ãjã'çmeetha'w. ⁷ Nawa pejka kxtee pa'jwa'jsa yuhtha'w sũhnaçxáatha'w fxi'ze'. ⁸ Txã'wê kwe'sxtxi jxpe'jsa tasxte pa'jwa'ja's jiitha'w, txãasatha'w naa kakwete ãtxĩ fxi'zeni's nvxi-htçxa txãa yakh ũsya' u'j wêje'. ⁹ Txãasa naa

kakwe yakh nee ūsí mtha'w yuu, khĩmeeçxa' naa kakwe's ji'phmée yã'jmtha'w yuu, nawa Kristo dxi'pte ew fxi'zewa'ja's yuuçxáatha'w pa'pçxu'. ¹⁰ Txã'wē jxpa'yakxmeete', Kristo tasxte jxukaysa kuutxa'jnisa yu'nja'w. Naa kiwete ew mtha'w selpiisáa yuu, meeçxa' ewmée mtha'w selpiisáa yuu nawa teeçxsa na'wēçxah peekx selpiini's jxpa'gawa'jsatha'w.

Dxus yakh yuuwemée neeyũuni's pta'sxni

¹¹ Txã'wē Kristo tasxte utxaaçxa ma'wē selpiisaçxawa txã'sa' paswa'j ji'ptha'w, txãasath Dxusna yuuçxáa selpi' i'kwe'sx dxi'pte. Adx ma'wē selpini'swa Dxusa' jiiyã'ja', aça' i'kwe'sxwa adx kīh yūusatewa jiyuwaça' ewna sūju'th. ¹² Adxa' thaakwe ew selpisaath jīna iuwejçx we'wena ūsmeeth, naasáa adx ew selpini's i'kwe'sx yaakxkahnçxáath txã'jī'. Txã'wē adx ew selpini's i'kwe'sxa' jii ūçxa iičxáa, adxna ewmée nuywe'wesawe'sxtxi' pasya' ājāne'kwe. ¹³ Adxa' luuku na'wē wá'ntka we'we', nawa txã' Dxus jī'. Aça' luuku na'wēmée we'weçxa yu', i'kwe'sxtxi ne'tka we'we' jiyukahn. ¹⁴ Kristo' jxukaysa pa'gate peeygāhçxa uuk, aça' txāa peeygāani's yajkxte', txã'sna selpiwa'j yuuçxáak kaseje', na'wē yajkxna: ¹⁵ Kristo' jxukaysa pa'gate uupa'ga, maawa txāa yakh ūssa' jxukaysa uusáa na'wēsatha'w yuu sūhna. Aça' txāa yakh fxi'zesawe'sxa' ma'wēwa fxi'zemée, wejxwa na'wē txāawe'sx pa'gate uuçxa ki' itxī yuuk txã'sçxáana selpiina fxi'zewa'jsata'.

¹⁶ Txãa pa'ga ãçxhũyã'ja' vxite ma'wēsatewa txãatx thegna ũusteçxáa yuhwa yaakxwa'j ji'phmeetha'w. Adxa' nyafxíi yu' wala ne'tka jxpuba, txãasaíith Kristo's naa kiwete kwe'sx na'wēysaiçxá' sũhna yaakxni ji'phu'. Nawa ãçxha' txã'wē yaakxni's yu'pthehwa'ja', ¹⁷ txãa pa'gatey maawa Kristo tasxte utxasá' jxuka yu'pthehnik yu'. Nyafxíi yajkxna fxi'zeni's nvx-ihtçxa, u'sesaçxaçxáak ya'jypa'ga'.

¹⁸ Txã'wē u'se yuuwa'ja's Dxusçxaçxáak vxitu', txãasak txãa yakh ew fxi'zewa'ja'swa vxitu', kwe'sx pa'gate Kristo's uuwa'j vxitçxa. Dxusa' txã'wē yũuçxak adxa's neewe'weçxa nvxiht, txãa yakh ew fxi'zewa'ja's jxukaysatx pta'sxkahn. ¹⁹ Ew jiyute yu', Dxusa' naa kiwete nasaa pkaltxi jxuka peltunãyçxa txãa yakh ew fxi'zewa'ja's pheu'jya'k txã'wē Kristo's uuwa'j vxitna ũsu'. Dxus txã'wē yũuni's pta'sxkahnku adxa's neewe'weçxa nvxiht. ²⁰ Txãa pa'ga adxa' Kristo nwe'weni's pta'sxya' Dxus kaahni yuhth. Txãasath Dxus yuu we'weç na'wē adxa' i'kwe'sxtxi jxkaaja' na'jina: Dxus tasxte mutxaawe, txãa yakh fxi'zeya'. ²¹ Kristo' kĩh pkal yuhwa ji'phu'çme', nawa kwe'sx ewmeesapa'gaçxáa txãak Dxus kastigo's jxpa'ga. Aça' kwe'sxa' Kristo's jxpa'gaçxa', ewmeesaçxawa Dxus dxi'pte yuuwemeesa yuukahnku txã'wē yũu.

6

¹ Txãasa adxa' Dxusna selpisaath. Txãa pa'gath i'kwe'sxtxi yu'kxpeje': Dxus peeygãani's

jiyuyã'jçxa', wa'lmée jxpa'gakahn. ² Dxus peeygãawa'j ena's na'wëk pta'sxi' Dxus librute:

Ju'gu yuuwa'j en ähte', wëse'th,

Sa' pu'çxthu ewte neeyũukahn jĩ'k.

Txãa pa'ga äçxha' txã'wë yũuwa'j en äjk, açã' naa ensu' ewte neeyũuwa'j ente ũstha'w.

³ Adx mjĩini's ewmée nuywe'wekahmen, kim yuhtxwa ewmée yũuna ũsmeeth.

⁴ Makwe wala pxthaa yuuna, wantãyna, kĩhtewa pejiina, thëyte fxi'zena ũsçxawa, Dxusna selpiinisaçxá'sthuh kaavxya'ja'jna fxi'ze'.

⁵ Adxa's pãpaçxa karcelte txaahnisath yuu. Wëesxuna ppxuuni wala thëyte fxi'ze'th. Çxhãçxha mjĩiweete deewa'j en yuhwa uymée, wëenath fxi'ze'.

⁶ Nawa Dxus dxi'pte na'wë ew yũuniçxá'sthuh kaavxya'ja'jna fxi'ze': açewe'weçtewa ka'tu yu' ew yũuna, Dxus Espiritu adx yakh fxi'zeni's kaajiyu'jna, ũsuh jxuka peeygãani's kaavxya'ja'jna, ⁷ isasaçxá's pta'sxna, Dxus pu'çxni's kaavxya'ja'jna. Sa' açewe'wesatx paswa'j ma'k yuu meeçxa' ppxuuçte paswa'j ma'k yuu nawa kĩhtewa ewçxáa paswa'ja'sçxáath yajxna fxi'ze'.

⁸ Sa' ki'kinte' wedxnith fxi'ze', nawa maa enteya' açenith fxi'ze'. Vxite ensuy yu' ew we'wena ki' ewmée we'wenith fxi'ze'. Ki'kinteya' ĩsxiisa' jĩna nuywe'weni, nawa maa enteya' isasa's pta'sxsa' jĩna we'wenith fxi'ze'.

⁹ Maa enteya' nasa jiyunimeesa thastxi adxa's we'we', nawa maa entey yu', adxa's wala namiku na'wëtx ew we'we'. Maa enteya' uuwa'theçxáa yã'th fxi'ze', nawa u'ç yu' meeth. Wala ppxuuni yuuçxawa,

ikhni yu' yu'çmeeth. ¹⁰ Makwe wala kxũusu'jni ũsçxawa, weçxanath fxi'ze'. Naa kiwete kĩhwa ji'phmeesaçxawa, maazkuẽesatxwa ji'phsath vxitu' Dxus dxi'pte. Makwe ji'phmeesaçxawa, kĩh yuhwa peejii yu' meeth fxi'ze'.

¹¹ Korintote yakthẽ'jwe'stxxi ĩsxiiçxa txã'jĩ'çmeeth, adx ũuste ũusutheni's jxuka äateth we'we'. ¹² I'kwe'sx yu' adxa's açeyaaki'ne'kwe, nawa adxa' ka'tu yu' i'kwe'stxxi' açeyaaki'çmeeth. ¹³ Neya' luuçtxxi's ma'wẽga peeygãhna we'we', adxwa i'kwe'stxxi' txã'wẽythu peeygãhna we'we'. I'kwe'sx ũus yaakxni's paaçteçxáa ji'phumée äate we'wekahnthu adx ũus yaakxni's äate we'we'.

Dxus ĩtxisa ũswa'jçxáatha'w

¹⁴ Dxusa's jiimeesawe'sx yakha' ptamuwa'jme'. Txã'wẽme' kxteeçxah txãawe'sx na'wẽy yũuna fxi'zeya' äjameene'kwe. Ewsa' ewmeesa yakh fxi'zewa'jsame'. Eena'sa' çxhi'dxsa yakh kxteeçxah ũsya' ewu'çmeeta'. ¹⁵ Kristo' eçxthẽ'j yakha' puutx utxa'çmeeta'. Dxusa's jiisa' Dxusa's jiimeesa fxi'zenite fxi'zewa'jme'. ¹⁶ Dxus ũsnite' Dxus ĩtxĩmeesa' ũswa'j ji'phmeeta'. I'kwe'sxa' Dxus ĩtxĩsa ũswa'jçxáa i'kwe. Txajĩik Dxusa' na'jĩna we'we:

Adxa' txãawe'sx Dxus yu'nja,

Txãawe'sx ũuste fxi'zewa'jsa.

Aça' txãawe'sxa' adx luuçx yuutxna jĩ'k.

¹⁷ Sa' vxite ajkhẽwa na'jĩnak we'we:

Ewmeesawe'sx ksxavxyu kasehçxa utxaanuwe,

Sa' ewmeesa's jxa'dxnuwe.

¹⁸ Txã'wẽ yũute', i'kwe'stxxi adx jxpa'gaçxa

Ney na'wě yu'nja.

Aça' i'kwe'sxa' adx luuçx yuune'kwe jĩ'k kĩhtewa
jxuka ãjãsa Dxusa'.

7

¹ Dxusa' txã'wě ew fxi'zewa'ja'sku jxkaaja'. Txãa pa'ga, yakthě'jwe'sx, wala jxpa'yakx fxi'zewa'j ji'ptha'w, kwe'sx kakwe ma'k yuu meeçxa' kwe'sx ũus ma'k yuu nawa suwwa'jsa yu'sa' ka'ga'jwa'j ji'phmeetha'w. Dxusçxáana yajkxna jxpa'yakx fxi'zewa'j ji'ptha'w.

Korintotewe'sx ewmée yũunijũ sxawedni

² Adxa's açeyaakxnuwe. Adxa' kim yuhtxwa ĩsxiina kaypuba'jna ewmée yũuna ũsmeeth.

³ Aça' i'kwe'sxçxáa yuuwesa i'kwe jĩçxa txã'jĩçmeeth. Txã'wě yajkxmeeçxaiith adx peeygãanisa i'kwe, txãasa adx yakh ja'daçxah fxi'zena txutemey uuwa'jsatha'w jĩnath we'we.

⁴ Makwe seena' nxuswa'j ente ũsçxawa, i'kwe'sxtxi yajkxçxa weçxanaçxáath fxi'ze', weh yuhwa ewmée yu' yajkxmée.

⁵ Macedonia kiwete pa'jii le'çxkuẽçxáa yuhwa jxkaasewa'j ji'phumeeth. Kĩhwa jxukak thěysaçxaçxáa vxyaa, adx pekũhnisu yu' mteewa jxuka. Açasawe'sx yakh pdxi'puwa'jwa ji'phuth, sa' ũustewa ũukh yaakxwa'j kasejk.

⁶ Nawa Tito pa'pha'ga Dxusa' adxa's kvxiisxa'kh, nxusna ũstewa. ⁷ Nawa Tito yakh puutx uypa'gaçxáa adxa's txã'wě weçxa en pa'jme'. Tito' adx tasxte seena' wala weçxana pa'kh, i'kwe'sx ew yũuya' yaakxpa'ga. Sa' pta'sxku txakwe wala ãhmée yũuçxawa idx yakh

weçxaya' puutx uy wėje'tx j̄nisak wejx wala kvxiisxa'j.

⁸ ¿K̄ijxa'ki'th i'kwe'sxtxi juuna' we'wena txã'wē karta fxi'j? s̄hna wala kuh yajkxthu txãa ensu yu'. Nawa āçxha' txã'wē yaaki'çmeeth. Nyafx̄i yu' txã'wē yaakxkahn̄i txãa karta' i'kwe'sxtxi wala kx̄ūusu'kh maz en yu'. Txagaçxh̄içx̄aa juuna' we'weni's kuh yajkxçxa', āçxha' adxa' weçxa'th. ⁹ Nawa i'kwe'sxtxi kx̄ūusu'jçxa weeçx yajkxna txã'wē weçxaçmeeth, wejxwa txãa juuna' we'wenisa' i'kwe'sxtxi wala selpiik, ewm̄ée ȳūuniij̄ũ kaasxwedujna, txãa pa'gaçx̄aath weçx̄á'. Aça' i'kwe'sxa' txãa nxus en pa'pha'ga ūusçxa yajkxm̄ée Dxus dxi'pte ew fxi'zewa'jçx̄á's i'kwe kxtey yuu. Txãa pa'gath adxa' kimnawa açesameeth s̄ju'. ¹⁰ Txãa pa'gatey āhm̄ée ne'tka'w yuu s̄hna wa'lm̄ée Dxus yakh ew fxi'zewa'ja's pakwete', ewm̄ée ȳūuni's nvxihtçxa ewte neeȳūuwa'ja'sku ya'jypa'ga. Txãa pa'ga nxuswa'j entxi' açewa'jme'. Nawa āhm̄ée ne'tka'w yuu s̄hwa'ja's yajkxmeete', vxituwa'jçx̄aak kaseje'. ¹¹ I'kwe'sxa' Dxusçx̄aana yajkxna ne'kwe txãa nxusnisa's āçem̄ée jxp̄a'ga. Aça' txã'wē ȳūupa'ga ma'wēga ew fxi'zewa'j kaseh txã'sa' miijaykxwe naata': Āhm̄ée ne'tka'w yuu s̄hna ūukhçxa yuwe's pheu'jya' yajkx i'kwe, txãa ewm̄ée ȳūusa's kastiḡâywa'ja's puutx we'wena. Txã'wē ȳūuçxa', adx yakh puutx uyya' yajkx i'kwe. Txãasa i'kwe yuuwemeesa yuu. ¹² Adxa' txãa karta's fxi'jçxa', txãa ewm̄ée ȳūusa's açeyajkxna txã'wē ȳūumeeth, sa' ewm̄ée ȳūute nxussa'swa

yajkxna txã'wẽ fxi'jmeeth, naasáa i'kwe'sxtxi' wala yuh yaaki'th Dxus dxi'pte txã'sa' i'kwe'sx jiyukahñçáath txã'wẽ fxi'j. ¹³ Txãasath i'kwe'sx kxtey yuute' wala weçxawa'ja's jxpa'ga.

Nawa na'wẽ weçxawa'ja's ji'phuth txãajũ jweeíçxáath wala weçxawa'j ji'phu i'kwe'sxa' Tito's wala ewçxáa jxpa'gaçxa ewçxáa ne'kwe jxpe'jna ũsu' aça' weçxanak sxawed naa pa'ga. ¹⁴ Adxa' Tito's kajaççxa' i'kwe'sxtxi we'wena: Wala ewsata' jĩth txã' ĩsxiini kasehme'. I'kwe'sxa' adx yaakxni's kxtey i'kwe yuu, Tito's ew jxpa'gana. Txãasa adx we'weni' багаçxtewa isasaçxaçxáata'. ¹⁵ I'kwe'sxa' ma'wẽne'kwe ewkuẽçxáa jxpa'gaçxa txajx we'weni's kxtey nwẽese'j txã'wẽ ew yũuni's yajkçxak Tito' jweeíçxáa i'kwe'sxtxi's wala weçxá'. ¹⁶ I'kwe'sxtxi's kĩhte yuhwa ewmée yaakxwa'j ji'phmeeth, txãasath weçxá'.

8

Ji'phuni's wa'lmée weçxana peesni

¹ ãçha' yakhthẽ'jwe'sxtxi pta'sxi'th Dxus luuçx Macedonia kiwesuwe'sxa' puçxwa'ja's ãate kaavxya'ja'jtx Dxus kaayaki'the. ² Txãawe'sxtxi' txakwe wala thẽyte fxi'zewa'j pa'jçxawa, Dxus yakh jweeíçxáa çxhãçxha fxi'zekahnku txã'wẽ yũu, txãa pa'ga wala weçxana fxi'ze'tx. Txãasatx wala ji'phmeesaçxawa ũçxi'dxmée pees. ³ Txãawe'sx ji'phuni yu'sa' wa'lméetx pees, sa' ma'wẽçxáawa yũuna pakweçxatx txã'wẽ yũu. Txã'wẽ yũuni's adxa' ew jiith. ⁴ Txãawe'sx

we'weçxa': Kwe'sxa' yakhthẽ'jwe'sxtxi pu'çxya' vxyuu pkhakh wẽje'tha'w aça' idxa' ɔma'jiki'g? jĩnatx we'we. ⁵ Aça' adxa' kxtee pa'j yu' yuumeetxna sũju'ne'thka. Nawa nyafxte' txãawe'sx kakwe yuunatx Dxus kusete dukh Dxus jxthãasniçxá's kxtey yuuya'. Txã'wẽ yũuçxatx kwe'sx ma'wẽ jxkaathewa kxtey yuuya' yajkx. Txã'wẽ yũuni'sthu pta'sxi'. ⁶ Aça' Tito nyafxii i'kwe'sx yakh ũsçxa', vxyuu pkhakhya' takhku txã'sa' pkhakhna kãaja'khan Tito's neewe'weçthu ki' yuja' naa pa'ga. ⁷ I'kwe'sxa' kĩhtewa jxuka ãjãsa i'kwe Dxusçxáana yajkxna, wa'lmée kaapiya'jna, wala jiisa i'kwe, dud pa'pçxuwa'ja'swa nwëese'jna adxnawa ahçemée peeygãasa i'kwe. Txãasa pu'çxwa'j vxyuu pkhakhwa'ja'swa txã'wëy myũuwe.

⁸ Juuna' jxkaahna txã'jĩ'çmeeth, naasáa vxitesa pa'pçxuni's jiyuçxa', i'kwe'sxwa isa peeygãja'ççxa', txã'wëy pu'çxhiwá'kwe sũhçxaçxáath txã'jĩ'. ⁹ I'kwe'sxa' peekx jii i'kwe kwe'sxtxi jxpe'jsa Jesukristo peeygãani's. Txã' ji'phsak yu', nawa kwe'sxtxi wala peeygãhçxa ji'phmeesak yuu, txajx ji'phuni's kwe'sxtxi ũsya'.

¹⁰ I'kwe'sxa' jũ'na anxutey pu'çxya' takhi'kwe, nawa jxkaatheçxáa txã'wẽ yũumée, peekx yuu i'kwe txã'wẽ pu'çxya' yajkx, aça' txã'wẽ yũunisa' ewsa yuja' jĩnath yu'kxpeje' adxa'. ¹¹ Nyafxiiwa ma'wëkwe weçxana peesna ũsu' i'kwe'sx ji'phuni yu'sa', ãçxwa txã'wëyçxáa myũuwe kãaja'phkaçx. ¹² Txãa pa'gatey ma'wëkuëçxáa ji'phçxawa, wa'lmée weçxana peesni's Dxusa'

jxpa'ga'k. Dxusa' jiia', ji'phmeetewa.

¹³ Txã'wě i'kwe'sxa' vxitesatx pu'çxte', txãawe'sxçxáa peejimée fxi'zete', i'kwe'sx yu' ji'phmée thēyte fxi'zekahn txã'jĩ'çmeeth.

¹⁴ Puutx ya'pu'çxna ja'daçxah peejimée fxi'zekahnthu txã'jĩ'. Åçxh naa ensuy yu' i'kwe'sxa' kīhwa ji'phi'kwe vxite peejiina fxi'zesatx pu'çxwa'j. Nawa vxite ensu' i'kwe'sx ji'phmée peejiina fxi'zeçpkaçxha', txãawe'sx i'kwe'sx peejini's pu'çxhitxna. Txã'wě yūuna puutx peejimée ya'fxi'zena. ¹⁵ Txã'wě puutx pu'çxwa'ja's pta'sxçxak Dxus libroute na'jĩ': Wala pkhaktewa kijxaame', sa' le'çxkuēe pkhaksanawa peejime' jĩ'k.

Tito yakh vxite kaapi'ki'jçxa kaahni

¹⁶ Dxusa' Tito's kaayaki'jne' adx na'wěy i'kwe'sxtxi's peeygāawa'ja's. ¹⁷ Txāa pa'ga āçxha' i'kwe'sxtxi's thegya' yuja' kimwa jxkaahmeete, txajx ūuste peeygāawa'ja's yajkxçxa, sa' adx neewe'weni's kxtey yuuya' yuja'.

¹⁸ Tito's pi'kxna teeçx yakthē'j kajaçthu. Txã'sa' Dxus luuçx msuuwe'sxwa wala neewe'we'tx Dxus yuwe's wala pta'sx pu'çxsa' jīna. ¹⁹ Sa' txã'wěçxáa neewe'wemée, txāa yakthē'ja's txhitxhtxi. Na'wě Dxus dxi'pte kselpi'ji'jwa'j vxyuu pkhakhna ūstha'w txã'sna adx dukhya' Jerusalenna u'jweçte pi'kxna u'jwa'jsa jĩçxatx txhitxh. ²⁰ Adxa's ewmée nuywe'wewe'sxte, txāa yakthē'ja' adx yakh ja'da yuua'jsa', na'wě peeswa'j pkhakhna ūsta' txã'sna jxūna u'jweçte. ²¹ Kīhtewa jxuka

ewçxáa yũuya' ũsthu, Dxus dxi'pteçxáamée, nasaa dxi'ptewa txã'wěy.

²² Titowe'sx txãa e'zsaçxáamée, vxite yakthē'ja'swa kajaçthu, txã' ew yũuwa'j yu'sa' kīhtewa jxukak pa'pçxuna fxi'ze', sa' ãçxha' i'kwe'sx yuutxi'sa' wejxku wala thaakwe weçxana yaaki'. ²³ Tito kxtee pa'the', i'kwe'sxtxi pēyiwáatxna ¿Tito' kimna? jīna, aça' Pablo yakh mjīi pu'çxsa' aye kwe'sxtxi selpisáa jīne'kwe. Meeçxawa vxite yakthē'jwe'sxtxi wáa ¿kimtxna? jīna pēyitxna aça' Dxus luuçx neewe'weçxa kaahnisata', Kristo's selpisáa jīne'kwe. ²⁴ ãçxha' i'kwe'sx peeygāani's áate mkaavxya'ja'jwe txãa yakthē'jwe'sxtxi ew jxpa'gana, kxah Dxus luuçx vxite ahsu pkhaakhesawe'sxwa i'kwe'sx peeygāani's jiyutxna, aça' i'kwe'sxtxi adx we'weçxa': Ewsata' jī'th txãawa kxtey kasejena.

9

Yakthē'jwe'sxtxi pu'çxwa'j vxyu pkhakhni

¹ Dxus yakh fxi'zesa yakthē'jwe'sxtxi pu'çxya' vxyuu pkhakhwa'ja's i'kwe'sxtxi kaayaki'jna fxi'jwa'j peejxmeena sũju'th, ² txãa pa'gatey i'kwe'sxa' kīhtewa wa'lsameetewa jūith. Txãasath Macedonia kiwesuwe'sxtxi'sa' weçxana na'jīna pta'sx: Akayasuwe'sxa' jū'na anxutey pu'çxya' ih ũsta' jīth. Aça' Macedonia kiwesuwe'sx maazkuéesawa i'kwe'sx pu'çxya' yaakxni's jiyuçxa', txãawe'sxwa pu'çxya' yajkxtxi. ³ Txã'wētewa naa yakthē'jwe'sxtxi' neewe'weçthu, kxah adx we'weçxa':

Korintotewe'sxa' pu'çxya' ih ũsta' jĩth txã' ĩsxiini yuumeena. I'kwe'sxa' kxtey yuukahnthu txã'jĩ'.⁴ Txã'wēme', Macedoniajūwe'sx maafia' adx yakh ja'datey yuusa' i'kwe'sx kxtey yuumée ũsiyna kpaakitxna, aça' wala thaame yuhna i'kwe'sx txakwe wala pu'çxya' ũsta' jĩnisa txã'wē kxtey yuumeete'.⁵ Txãa sũhçxath naa yakhthē'jwe'sxtxi yaçte kaajxa' yajkx i'kwe'sx tasxna, aça' txãawe'sx pa'jçxa' na'wē pu'çxwa'j pkhakhya' yajkx i'kwe txã'sa' pkhakh pu'çxna jxã'khan. Kxah i'kwe'sx wala pkhakhya' neeyũui'kwe txã'sa' ũçxhi'dxmée kãaja'jane'kwe, makwe peesweçxtewa.

⁶ I'kwe'sxa' peekx jii i'kwe: walamée mjĩite', ũ'wa wala meek kaseje'. Nawa wala mjĩite', ũ'wa txã'wēy walak kaseje'.⁷ Teeçxsa na'wēçxah i'kwe'sx ũuste makwe peesweçxte', txã'sçxáa kxtey yuuwa'ja'. Wa'lna txã'wē yũuwa'jme', txãa pa'gatey Dxusa' peeygãja'k ũuste weçxana txã'wē peessa's.⁸ Txã'wē yũute', Dxusa' peejimée ũsna nes yuuna i'kwe'sx peejini yu'sa' jxuka. Txajĩçxáa i'kwe'sxa' vxitesatxwa ũçxhi'dxmée wala pu'çxya' ãjãne'kwe.⁹ Txã'sna we'weçxak Dxus libroute na'jĩ':

Ji'phmeesatx wa'lmée weçxana pu'çxsa's txã'wē ew yũupa'ga,

Dxusa' peejxmée ũsna nes yuuna jĩ'k.

¹⁰ Uuhwa'j fxiwa's Dxusku ũsu', sa' txãaĩçxáak kbuuçxa'jna nuywalá'. Txãa pa'ga i'kwe'sxa' ũ'wa'ja's peejxmée jxuka uyçxa', vxitesatx peeswa'ja'swa wala uyuune'kwe.¹¹ Txã'wē yũute', i'kwe'sxa' kĩjkĩhwa ji'phsa yuuçxa

wa'lmée pu'çxya' ãjane'kwe. Aça' i'kwe'sx ũçxhi'dxmée peesya' pkhakhni's kwe'sx jxūna u'the', jxpa'gasa yakthē'jwe'sxa' Dxusa's weçxaatxna. ¹² Na'wē yakthē'jwe'sxtxi pu'çxwa'j kajaçtha'w txā' txāawe'sx peejiniçxá's selpiwa'jsame'. Txā'wē yūupa'ga txāawe'sxa' Dxusa's wala weçxakahn txā'wē pu'çxhiçtha'w. ¹³ Na'wē pu'çxnisa's txāawe'sxa' jxpa'gaçxa', Kristo jxkaahni's nwēese'jsa yuh yu'ta sūhna jiyutxna, txāasa Dxusa's tuuthe'jna wala weçxaatxna, txā'wē i'kwe'sx wa'lmée peesya' pkhakhçxa txāawe'sxtxi peesna vxitesatxwa peespa'ga. ¹⁴ Dxus pu'çxte i'kwe'sxa' txā'wē ew yūupa'ga, txāawe'sxa' iiméh wala weçxana Dxus yakh puutx we'wetxna i'kwe'sx pa'gate. ¹⁵ Dxusa's iiméh wala weçxa'tha'w txajx Nçxi'ka's yuu kwe'sxtxi peespa'ga.

10

Pablo juuna' jxkaahwa'ja's Kristo ũsni

¹ Adxa' Kristo na'wēy wala peeygāhna i'kwe'sxtxi we'we'th, adxa's açewe'wena na'jī'i'kwe txā'sna: Pablo' kwe'sx yakh ih ũççxa yu' ma'jīme'. Nawa jxu'j txuteeyā'jçxa', wala juuna' we'wena jxkaaja'k jīna i'kwe nuywe'we'. ² Adx i'kwe'sx tasxte pa'jçxa maaiitxi's juuna' yuukahmen, adxa's nuywe'wenuwe, txā'wē Dxus jxthāasnime'sku juuna' jxkaaja' jīna. Txā'wē nuywe'wesa yakh yu' puutx pdxi'puya'çxáa ũsthu maa yakhwa. ³ Adxa' i'kwe'sx na'wēy nasaçxáa yuhth. Nawa adxa' naa kiwetewe'sx na'wē puiiya' ũsmeeth. ⁴ Kwe'sxa' naa

kiwete puinisa yakh pui'çmeetha'w. Dvus kaaũusuthe'jnisa yakhtha'w pui'. Txãasa ewmeesa yu'sa' makwe seena' walasatewa knaywa'jsatha'w. ⁵ Txãasatha'w knayu' Dvusa's jiyukahmen yupsa yu'sa' ma'wēsatsxwa, kwe'sx ũus yaakxni yu'sa' nwēese'jmée, Kristo kaaũusuthe'jniçxá'stha'w kxtey yu' Kristo's nwēese'khan. ⁶ Sa' i'kwe'sx yu' ew yã'j nwēese'thewa, maaí yu' nwēese'jmée ũssatxi's maatxwa kastigãyya'çxáa ũsthu.

⁷ I'kwe'sxa' ãakhēwe'sxçxá's i'kwe thegu', txã'wē maawa Kristo's selpisath sũhna yaakxxa', adxnawa txã'wēy Kristo's selpisana sũhna yaakxwa'jna. ⁸ Adxa' juuna' jxkaahwa'jsath jĩna we'wena nesthu yu', nawa txã'jĩpa'ga thaamewa'j yu' ji'phmeeth. Txãa pa'gatey Kristok txã'wē ivxiitumée wejxwa juuna' jxkaahna yu'kxpehwa'ja's adxna ũs, i'kwe'sxa' Dvus yakh çxhãçxha fxi'zekahn. ⁹ Aça' ũukhkahnku karta juuna' fxi'jçxa kaja' sũhna yaakxnuwe. ¹⁰ Sa' i'kwe'sx we'weçxa': Kartate yu' wala juuna' we'wena fxi'ja'k, nawa puutx pdxi'puçxa yu', jxkaahwa'j yu'sa' aja'çme' jĩ'i'kwe. ¹¹ Nawa txã'jĩsa' jxpa'yakina, ma'wētka jxu'ju ũsçxa, juuna' we'wena karta kaja' na', txã'sa' kxtey yu'nja i'kwe'sx yakh puutx uyna pa'jçxa'.

¹² Wala mjĩisatha'w jĩna weeçx we'wesa yakh kaaja'da'jna ũs wēemeeth. Txãawe'sxa' iiméh wala jiimeeta', txãasatx vxitesate thaakwe mjĩisatha'w jĩna fxi'ze'. ¹³ Adxa' txãawe'sx na'wēy vxitee mjĩinisu iweeçx

we'wena fxi'zewa'j ji'phmeeth. Adxa's Dxus mtee pa'j mjīina pekūhwa'ja's ūsuna kxtee pa'j mjīiwa'jsath. Txā'wēçxa íçxáath adxa's Dxus kaathe', i'kwe'sx tasxtewa pa'j. ¹⁴ Txā'wē adx pekūhwa'jmeesu yu' u'jmée ūsthu na', i'kwe'sx tasxsuwa adx pekūhwa'jmeewaç yu', i'kwe'sx yakh ūsya' nyafxíi pa'jwa'jmée ne'tka yu'. Nawa i'kwe'sx tasxsu adx pa'jwa'kh yu', txāa pa'gath Kristo kaapiya'jni ewsa's i'kwe'sxtxi pta'sxya' adx nyafxte pa'j. ¹⁵ Txāasa adxa' vxitee mjīini's iweeçx we'wena ūsmeeth. Txā'wē we'wemée wejxwa Dxus pu'çxte', jweeíçxáa i'kwe'sx yakh wala mjīiya' āja'nja, i'kwe'sxa' jweeíçxáa Dxusa's jiyukahn sūju'th. Nawa Dxus mtee pa'j mjīikaathe', kxtee pa'jçxáa. ¹⁶ Txā'wē yūuçxa txāa e'su' vxite ahsuwa kaseje'nja Dxus yuwe ewte nvxiitwa'jsa's pta'sxna. Nawa vxitee mjīinisu yu' iweeçx we'wena u'kame'nja sūju'th.

¹⁷ Adxthu mjīi jīna we'wepkaçxte, wejxwa Dxusku mjīi sūhnaçxáa weçxana fxi'zewa'ja'.

¹⁸ Txāa pa'gatey iiwejçx we'wesa txā'wē Dxus dxi'pte ewsa kaseje'çme', naasáa Dxus we'weçxa txā' ewsa' jīnisa yuuçxáa ewsa'.

11

Kristo kaahnisatha'w jīna ĩsxiina u'jusa

¹ Adxa' i'kwe'sxtxi yu'kxpejxa' sxiigu'ne'thka, nawa txāatxi' mwantaīwe. Makwe āja'çmeewá'ntka, nawa āçxwa mwantaīwe.

² Adxa' i'kwe'sxtxi' Kristo tasxu weh yuhwa txutee jxthāasu'çmeeth. Kna'sawa ma'wēga teeçxa yakh yuuçxáa imi'çxa fxi'ze', txā'wēy

i'kwe'sxtxi' Kristo yakh yuuçxáa kaafxize'jya'th neeyũu Dxus dxi'pte. ³ Nawa eçxthē'ja' nyafxíiwa ma'wēga Ewa's ĩsxii, txā'wēy āçxwa i'kwe'sxtxi's ĩsxiijawáana, aça' Kristo yakh txakwe ew fxi'zeççxawa txuteewá'kwe sũhçxath ũukhu'. ⁴ Txā'wē yaakxahníi i'kwe'sxa' wa'lmée jxpa'gana ũsi'kwe adx pta'sxi'th Kristo kaapiya'jni's txā'wēmée fxiy pta'sxsatx. Sa' nyafxii jxpa'gai'kwe Dxus Espiritu's txā'wēmée fxiysanawa wa'lmée weçxana jxpa'gana ũsi'kwe. Txā'wēy Dxus yuwe ewte nvxiitwa'jsa's nyafxii wēse'ji'kwe txā'wēmée fxiysatewa wa'lu'çmeei'kwe. ⁵ Txā'wē fxiy kaapiya'jsawe'sxa' Jesus jxkaahnisa walasatha'w jĩ'tx, nawa adxa' txāawe'sxte āhmeeekwesa ne'tka sũju'çmeeth. ⁶ Adxa' we'weya' yu' ājāçmeene'thka, nawa adx ũuste yu' wala jiith. Txāasa iıçxáath adxa' i'kwe'sxtxi' áate kaajiyu'ju' adx jiyuni's bagaçxtewa.

⁷ Txā'wē i'kwe'sxtxi kçxhāaçxha'jya' sũhçxa, i'kwe'sx yuutxi's vxyuu pējxmée adx vxyuu yakthtu fxi'ze' Dxus yuwe's pta'sxna. Sa' txā'wē yũuçxa', ewmeewá'ntka yuukx. ⁸ I'kwe'sx yuutxi' vxyuu thāasmée, wejxwa Dxus luuçx vxite ahsuwe'sx adxna peestxi txā'snath i'kwe'sx tasxte kaaselpi'ji'. ⁹ Sa' i'kwe'sx tasxte ũsçxa', adxa' peejiıçxawa i'kwe'sx yuutxi' maa yuhtxwa thāasmeeth. Adx peejini's Macedoniajũ yakthē'jwe'sxtxi pees. Txā'wēth wala jxpa'yakx fxi'zena ũsu' i'kwe'sx yuutxi's maa yuhtxwa thāasmée, sa' i'kwe'sx yuutxi's thāasme'nja bagaçxtewa. ¹⁰ Adx

ũuste isa yajkxçxa we'weni's Kristo' jiia', açã' Akayasuwe'sxa': Pablo' txã'wẽ vxyuu thãasku jïya' ãjãmeetxna. ¹¹ Kwe'sxtxi ahçeçxak Pablo' txã'wẽ we'we' sũjuwá'kwe. Nawa txã'wẽ yũumée, i'kwe'sxtxi wala peeygãja'th txã'sa' Dxusa' jiia'.

¹² Nawa na'wẽth vxyuu thãasu'çmée na' txã'wẽ yũuna nes yu'nja, adxwa ma'wẽtka kïhwa thãasmée Dxus yuwe's pta'sxna ũsu' açã' txã'wẽy txãawe'sxwa kïhwa thãasmeetha'w jïya' ãjãmeetxna. ¹³ Txãawe'sxa' Jesus jxkaahnisatha'w jïna ãsxiinisa's isasa na'wẽ we'wena u'jusaçxáata'. ¹⁴ Txã'wẽ yũuni's fxiy yuh yuune'ta sũhna yaakxwa'j ji'phmeetha'w, txãa pa'gatey eçxthẽ'j seena'sa yuhçxawa angel ewsa na'wẽ yuuçxak vxya'. ¹⁵ Açã' kxahtx eçxthẽ'ja's selpisaawa txã'wẽy ewmeesaçxawa ewsa na'wẽ yuuçxa vxya'. Nawa txã'wẽ ewmée yũuna fxi'zepa'ga vxituwa'ja's ji'phutxna.

Kristo kaahnisa Pablo pxthaa yuuna fxi'zeni

¹⁶ Adxa' na'jï'th na': Luukumeeth, nawa txã'wẽtewa luukuna sũhna yaakxsa yakh yu' luuku na'wẽyçxáawa ki' we'weya'wath: ¿Adxçxáa kïh yũuçxa iiwejçx yaakxwa'ja's ji'phmée yuuki'th? ¹⁷ Iiwejçx we'wenisa' Kristo jxkaahnisameeta', naasáa luuku yuusáa we'wenisaçxáata'. Txãa pa'ga adxa' luuku yuusáa we'weniçxá's we'weya'wath. ¹⁸ Naa kiwetewe'sxçxá's jiiçxawa nakwe wala iiwejçx yaaki'tx açã' adxwa iiwejçx yaakxwa'j ji'phne'tka. ¹⁹ I'kwe'sxa' txakwe wala jïisatha'w sũju'i'kwe nawa luuku we'wesa yuutxi'

jiyumeei'kwe nwēese'je'. ²⁰ Txãasa i'kwe txãawe'sx juuna' kaaselpi'jini's wa'lu'çmée, ãxiiçxa vxyuu kusa'ja'tx, sa' i'kwe'sxtxi iiyamuçxa ahçenatx jxpe'je' uyiina. ²¹ Nawa adxa' txã'wēy juuna' yuuya' ãjãmeeth, aça' thaame yuja' nawa pta'sxi'th.

Nawa vxite txã'wē yã'j iiwejçx we'weçte', adxwa txã'wēy luuku we'weni's we'wewa'j ji'pthu. ²² Txãawe'sxa' hebreowe'sxtxna, aça' adxwa txãath. Israelwe'sxtxna, aça' adxwa txãaiiçxáath. Abraham ji'jtxna, aça' adxwa tx-ajũjwe'sxthu. ²³ Kristo's selpiisaatha'w ji'tx, aça' adxa' txãawe'sxte wejx jxthaakwe selpiisath. Txã'wē iiwejçx we'wenisa' luuku yu-usáa we'weniçxá', nawa we'weçthu. Adxa' txãawe'sxte jxthaakwe mjĩisath, txãawe'sxte jxthaakwe pkuunisath, karcelte maazkuēe uswa kxuuphnisath, maazkuēe uswa uuwa'theçxáa yã'j fxi'zesath. ²⁴ Adxa's judiuwe'sxa' taç us kastigãyçxa' treinta y nwewe ãhpkaçxtxi peçxujkwe. ²⁵ Tekh usthu pâpani yuu. Teeçx ente' kwet wãatatahçxa ikhe'dxihtx. Tekh usku adx u'jni barko' ãkh dxiikhē khēe. Vxite ente' teeçx kus pe'te teen utath ãkhsu pehdna u'ju'. ²⁶ Iiméh wala pekũhsath, yu'wala seena'suwa ktejkana, peswée ikh wēeni, adx nwe'sx íiwa ikh wēeni, maawa txã'wēy yũu wēeni. Çxhabsu ma'k yuu, meeçxa' dxi'the ma'k yuu, meeçxa' ãkhte ma'k yuu, nawa txã'wēçxaçxáath ũukh ũukhte fxi'zena ũsu'. Yakhthē'jwe'sxtha'w jĩna ãxiisawa ikh wēeni yuuçxáath u'ju'. ²⁷ Mjĩina nxusteth fxi'ze'. Maazkuēe kuswa dehmeeth u'juwa'j ji'pthu', pxthaa wēena, yũ'wēena, ũ'wa'j

uymée maazkuēe uswa u'ju'th, ropa ji'phmée kumana pxthaa yuuna.

²⁸ Txā'wē nxuste fxi'zenisaçxáatx ji'phumeeth. Dxus luuçx msuuwe'sxtxiwa jxuka peeygāhna yaakxwa'ja'swa een isath ji'phu. ²⁹ Maawa Dxus yakh çxhāçxhamée fxi'zeçte', adx yuu txā'wē yuuç na'wēth yaaki' txāawe'sxtxi peeygāhna. Maaítxi's pkalte kweete'jeçte', adx yuu txā'wē pkalte weteç na'wēth yaaki' txāawe'sx pa'gate. ³⁰ Adxa' iivejçx we'weya'waçxa', wejxwa adx pxthaa yuuna fxi'zeçte Dxus pu'çxku txā'sçxáana yaakxwa'j ji'pthu. ³¹ Bagaçxtewa tuuthe'jni fxi'zewa'jsa kwe'sxtxi jxpe'jsa Jesukristo Tata'jiia' adx ísxiimée isa we'weni's. ³² Vxite ente' adxa's na'wētx yuu: Damasko çxhabte ũste', Aretas jxkaahna ũsni kiwete ne'jwe'sxa' çxhabte u'kani vxitxte adxna tudwa'jsa txajk. ³³ Nawa adxa's kanastate akhçxa wentana muralxakhētx spajkx. Txā'wē yūuçxath iyu ewmeesa kusejū.

12

Kristo kaavxya'ja'jni's uyni

¹ Peekíçxáa iivejçx we'weni yakha' kīh yuhwa ewsa ya'kutxi'ji'çme', aça' wejx yuuwa Kristo kaavxya'ja'jni's uyniçxá's we'weya'wath. ² Katorce anxu yuuça' txāa ensu' teeçx piçthē'j Kristo's nwēese'jsa's tekh cielute kāhpkçaçx jxūna u'jnik yuu txāa piçthē'ja's jiith. Txā'sa' petx kakwe ma'k jxūna u'jni yuu, meeçxa' kakwe ji'phmée ma'k jxūna u'jni yuu nawa Dxusçxáa jiina. ³ Ma'wēne' yuu kakwe ji'ph ma'k jxūna u'jni yuu, meeçxa' ji'phmée ma'k

jxūna u'jni yuu txāa yu'sa' jiimeeth, Dxusçxáa jiia'. ⁴ Nawa jxūna u'jni yuh yuuk Dxus ūsnite pa'j. Aça' kxteea' we'weni wēse'kh, kim yuh-nawa pta'sxwa'j meea's. ⁵ Txā'wē yūunisaçxá' iiwejçx yajkxya' ya'ājayujuna. Nawa iiwejçx we'wena ūs wēemeeth, naasáa adx pxthaa yu-una fxi'zeniçxá's yaakxwa'j ji'pthu. ⁶ Adx iiwejçx we'we wēewaç yu', txā' ĩsxiinisamée yuh yuuna, txāa pa'gatey isasaçxá'sku ya'we'we' naa pa'ga. Nawa txā'wē yu' iiwejçx we'we'çmeeth, kxah maa yuhwa adxa's thaakwe walasana sūhna yajkxmeetxna adx fxi'zeni's uyna wēse'jçxawa.

⁷ Txā'wē Kristo kaavxya'ja'jnisa' iiméh seena' wala zhiçxkwesa yu'k, aça' txāatx jiyuçxa adxa' iiwejçx yaakxwe'sxte, adx kakwete seena' wala akasa kaapa'ja'jnith yuu, eçxthē'j kaahnisa. ⁸ Aça' Kristo's tekx uswa pějxthu txāa aka's kaykase'khan. ⁹ Nawa Kristo' na'wēçxáak pas: Peeygāhçxa adx pi'kxna ūsni wejx thaakwe ewsa', txāa pa'gatey çxhāçxhameesaíçxáa adx pu'çxni's jxpa'gawa'jsata' jī'k. Txāa pa'gath weçxana fxi'ze', aka yu' kasemeetewa, Kristo' adxa's peeygāhçxa pu'çxna nes yuuna sūhna. ¹⁰ Txāa pa'ga adxa' wa'lu'çmeeth, çxhāçxhameekuē fxi'zeni, wēesxuni, pejiina fxi'zeni, yahçena fxi'zeni, Kristo's selpiipa'ga thēysa pa'ja'tx txāatx, txāa pa'gatey naa kakwete jwee íçxáa nxuste çxhāçxhameekuē fxi'zeççxa yu', jwee íçxáath Dxus yakh çxhāçxha fxi'ze'.

Dxus yakh fxi'zesa Korintotewe'sx ewmeewáa fxi'zena ūstxna sūhçxa Pablo kuh yaakxni

11 Luuku na'wēth peekíçxáa weeçx we'we, nawa i'kwe'sx jiyukahnu txã'wē we'wewa'j kaseh. Adxa' Dxus dxi'pte yu' āhmeekwesaçxawa, na'wē Jesus jxkaahnisa walasatha'w jĩ'tx txãawe'sxte yu' āhmeekwesameeth. Txãa pa'ga i'kwe'sxa' adx ju'gu yuuwa'jsa i'kwe yu'. ¹² Txãasath adxa' i'kwe'sx ksxavxyte selpiina ũsçxa', kīhtewa wantāyna kījkihwa kaavxya'ja'th kim yuhwa ewunimeesa iiméh wala zhiçxkwesatx. Txã'wē yūunisatx kaajiyu'jsa yu', adxa' ĩsxiimée Jesus jxkaahnisatewa. ¹³ Dxus luuçx vxite ahsuwe'sxte thaakwe āhmeekwesamée i'kwe, nawa adxa' peeygāhçxath i'kwe'sxtxi's pu'çx thāasmée. Txã'wē i'kwe'sxtxi kīhwa thāaspa'gamée ĵmpeltunaīwe!

¹⁴ Āçxha' i'kwe'sx tasxna pa'jya' yuuwa'ja's pheu'jçxa jĩ'pthu naa yakha' tekx us yujxa' yaakiçthu. Nawa i'kwe'sx yuutxi's thāasme'nja, txãa pa'gatey i'kwe'sx pu'çxwa'jsamée i'kwe, wejxwa i'kwe'sxtxi adx pu'çxwa'jsath ney na'wē. ¹⁵ Txãa pa'ga adx jĩ'phuni yu'sa' jxuka ũsu'nja, adx ĩtxĩ fxi'zeniyā'jçxa, i'kwe'sx ũustxi vxitu jxthāasmeeçxa. Txã'wēth adxa' i'kwe'sxtxi jweeíçxáa peeygā'ja', naapkaçxha' i'kwe'sx yu' adxa's jweeíçxáa i'kwe açe'.

¹⁶ I'kwe'sxtxi adx kīhwa thāassameete jiiçxawa, maaíi yu' na'wē i'kwe we'we': Txã'wē āate yu' kīhwa thāasmeeçxawa, ma'wē kutxi'jwa'ja'swa jiik yu', txāasaçxáak kīhwa pējxmée jĩ'i'kwe. ¹⁷ Txã'jīkahna', na'wē Tito yakh teeçx yakhthē'j i'kwe'sx tasxna nyafxçxah kaath, çtxagaçx wá'ntka

i'kwe'sxtxi' ĩsxiiya' yajkxçxa kaah? ¹⁸ Tito's i'kwe'sx tasxna nyafxçxah kaja'ççxa', vxite yakhthē'j kaapi'ki'jçxath kaah. ¿Txān ente wá' Tito i'kwe'sxtxi ĩsxii? Adxa' Tito yakh teeçxsa na'wēçxah ew yajkxnaçxáa fxi'zesate çjiimeewá'kwe?

¹⁹ Kwe'sx dxi'pte ewte neeyũu wēçxaçxáak txã'jĩ' sũjuwá'kwe, nawa txã'wēmeeth, wejxwa Dxus dxi'pteth we'we' Kristo jxkaahniçxá's, kxah i'kwe'sxa' Dxus yakh jweeĩçxáa çxhãçxha fxi'zewa'ja's uyuune'kwe, adx yakhthē'jwe'sx yaakxnisa. ²⁰ Txã'wēme', i'kwe'sx tasxte pa'jçxa', adx jxkaahnime's wáa uyu'nja. Sa' peeygāhna pa'japkaçxte, juuna' yuuwa'j wáa kasejena sũhte ũukh yuja'. Txã'wē adx pa'ja'çte', i'kwe'sxa' puutx puina, vxitee ji'phunitx açeyajkxna, ũusaçxana, puutx txuteena, yuwe susna, e'sgaçxáa açewe'wena, iiwejçx yajkxna, ewmée wáa fxi'zena ũs yuune'kwe sũhtek ũukh yuh yu'. ²¹ Sa' i'kwe'sx tasxna yujxa'wath txāa ente' i'kwe'sx pa'gate adxa' Dxus dxi'pte thaamewa'j ji'phuwá'nja sũhçxa ũukhu'th. Txã'wē i'kwe'sx txakwe txaçxtewa pkal kazxsate íçxáa fxi'zena ũste uyna pa'jçxa', wala nxusna ũ'newa'j ji'phu'nja sũhçxath txã'wē ũukh yaaki'.

13

Yu'kxpehna yuwe weçxaa kaahni

¹ Naa yakha' tekx us i'kwe'sx tasxna pa'jya' yuuwa'ja's yaakiçthu. Kxtee pa'jçxa', kĩh yuwe's pheu'ju'ççxawa, jiisa e'z meeçxawa tekx txahçxa yuuwesa's kastigāywa'j yuuna.

² I'kwe'sx yakh kxtee nyafxíi ũsçxa', jxpa'yakx fxi'zekahn dxiiikhēy we'weth pkalte fxi'zesatx maatxwa na'jīna: I'kwe'sx tasxte ki'kin pa'jçxa', peltunaīme'nja jīni's āçxha' ki' kaayaki'jiçthu nee jxu'the ũsíi. ³ I'kwe'sxa' adxa's jiyu wēena ũsi'kwe Kristo kaahnisa dxih'tewa, txā'sa' adx pa'the jiyune'kwe. I'kwe'sx āhmée yūusatxi's Kristo' juuna'meeuē jxkaja'çme', txāasa txajx juuna' jxkaahni's i'kwe'sx ksxavxyte kaavxya'ja'jya' ũsa'. ⁴ Txā' naa kiwete çxhāçxhameekuē fxi'zesa na'wē yuh kluuste fxuçni uuk, nawa itxī yuuk seena' çxhāçxha yuuwa'ja's Dxus ũste. Adxwa txāa na'wēy naa kiwete çxhāçxhameekuē fxi'zeni's ji'phuçxawa, txāa yakh fxi'zeçxa', Dxus kçxhāçxha'jnith fxi'ze' i'kwe'sxtxi yu'kxpehwa'jsa.

⁵ Txāa pa'ga çma'wē ũskxtha'w? sūhna meswe, aan Dxus yakh fxi'zena ũsne'kwe. Īsxiisamée Dxus luuçx dxihçxa', çJesukristo's ũuste ji'phkwe'? ⁶ Jesukristo's ũuste ji'phdxihçxa', adxa's ew jiyune'kwe, Dxus luuçxthu jīna isath we'we' naa pa'ga. ⁷ Txāasath i'kwe'sx pa'gate Dxus yakh puutx we'we', kīhwa ewmée yūuna fxi'zekahmen. Adxa' ĩsxiçxa txā'jī'çmeeth, naasáa i'kwe'sx ewçxáa fxi'ze jxthāasçxath txā'jī'. Adxa' ĩsxiisa na'wē wá'ntka, nawa txāa yu' kīh yuumeena. ⁸ Txāa pa'gatey isasa's kxtey nwēese'jwa'jçxáa ji'pthu. ⁹ Dxus yakh i'kwe'sx çxhāçxha fxi'zeçte', adxa' weçxa'th. Adx yu' çxhāçxhameekuēçxawa, Dxus yakh puutx we'wena nes yu'nja, i'kwe'sxa' Dxus yakh çxhāçxha fxi'zeyá' ājākahn.

10 I'kwe'sx tasxna yuhmey, naa karta's fxi'jçxa yaçte kajaçthu, kxah adx pa'jçxa', i'kwe'sxtxi juuna' yuuwa'j ji'phume'nja. Txã'wẽ juuna' yũuwa'ja's Kristok adxa's neewe'we, i'kwe'sxa' Dxus yakh txutemée jweeíçxáa çxhãçxha fxi'zewa'ja's ji'phukah. I'kwe'sxtxi wejx yuuwa kçxhãaçxha'jnath txã'wẽ yũ'.

11 ãçxha' yakhthẽ'jwe'sxtxi neewe'we'th ewçxáa fxi'zekahn. Kĩhtewa jxpubamée fxi'zewa'jçxá's mpaakwewe. Kvxiisxa'jni myũuwe. Kxteeçxah zhiçxkwe puiimée mfxi'zewe. Aça' ew kaafxi'ze'jsa Dxusa' i'kwe'sx yakh nes yuuna peeygãhna. 12 Ũsuh jxuka yajkçxa puutx teeçxsa na'wẽçxah yuwe mweeçxawe. 13 Dxusa's jiisa yakhthẽ'jwe'sx jxukaysatx yuwe weçxaakaja'.

14 Dxus yakhçxáa mfxi'zewe. Jesukristo pu'çxhina, Dxus Espiritu yakh txutemée fxi'zekahn.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd